

Gvangjsih Minzcuz Bau

广西民族报 ganhhau: CN45-0036 B.2020 Nd.9 Ng.30 liggaueq gengcej nienz ndwenbet cibsei

Gunghcwngz Hai Daihhoih Angqhoh Laeb Ndaej 30 Bi

9 nyied 25 hauh banhaet, doenghboux ndaw aendoih angqhoh Daengx Guek Yinzda Minzveij, Guekgya Minzveij, doenghboux ndaw aendoih daibyauj Swcigih, Gveilinz Si, caeuq gyoengq dangjyenz ganbu ginzcong Gunghcwngz Yauzcuz Swciyen, gungh geij cien vunz doxcomz guhdoi, angqhoh aen swciyen neix laeb ndaej 30 bi gvaq.

Banhaet 9 diemj, aen daihhoih angqhoh heijdaez. Gak gaep gak baih daibyauj youq gwnz daihhoih gangjavah. Youq ndaw vah gyoengqde, gyoengq bouxdaez baih Guekgya

caeuq Swcigih, Gveilinz Si de cungj haenh Gunghcwngz Yauzcuz Swciyen 30 bi daeuj guh baenz hauilai saeh, caensim angqhoh Gunghcwngz caeuq vunz Gunghcwngz gvaq ndaej ndei, caensim maqmuengh Gunghcwngz coglaeng hwnghat lai ndei caeuq vix gyoengqde baenzlawz hwnghat lai ndei.

Mwh hai daihhoih angqhoh, gyoengqvunz Yauzcuz aen yienh neix daenj ndangdaenj gyaunde, gyoebbaenz gak aendoih doxlwnz yienj cezmuz ndeiyawj dangqmaz. Hai sat aen daihhoih angqhoh, gyoengq hek daengz giz langhbaij yawj aen swciyen

neix laebbaenz 30 bi doxdaeuj guhbaenz gijmaz, lailai rox gaxgonq vunz Gunghcwngz baenzlawz caezhoz buekguh, haenqrengz hwnghat baenaj caeuq guh baenz gijmaz saeh hungloet, vanzlij vunz gak cuz ndaw yienh neix miz saenqsim youq giz moq seiz moq hwnqguh "aen Gunghcwngz gyaunde, aen Gunghcwngz mwnhoengh, aen Gunghcwngz miz vwnzva, aen Gunghcwngz fouq-miz, aen Gunghcwngz vwnzmingz, aen Gunghcwngz vuenyungz".

(Veiz Sangyungz Sung Vwnz Liengz Cingz)

Gvangjsih Nungzminz Comz Yienj Cezmuz Vwnzyi Haenh Mbanjranz Yienghsiengq Moq Youh Gvaq Siujgangh



9 nyied 22 hauh daengz 23 hauh, aen hozdung Gvangjsih nungzminz com yienj cezmuz vwnzyi youq Hocouh Si Bazbu Gih, Bwzhaij Si Hozbuj Yen, Yilinz Si Hinghyez Yen, Bwzswz Si Denzyangz Yen 4 aen hoihciengz neix guhsat lo. Aen hozdung neix daj bineix 4 nyied hainduj doxdaeuj, youq daengx gih 14 aen si gungh yienj 770 aen cezmuz, 1.4 fanh lai nungzminz lajmbanj camgya. Geij aen hoihciengz neix gungh comz miz 1300 bouxyienj yienj 109 aen cezmuz. Gyoengq nungzminz lajmbanj neix yienj cezmuz angq lwnh sou ndaej lai, doengzcaeaz gangj saedcej siujgangh; hauilai cezmuz miz gij daegsaek Bouxcuengh, Yauzcuz, Myauzcuz daengj, bouxyawj maij yawj caeuq haenhndei. Ndaw doz dwg gyoengq bouxyienj Yungzuij youq Hocouh Si yienj diuqfoux 《Cingz Bya'myauz》.

(Liu Cujbingz/廖祖平)

Gih Raeuz Ok 7 Cungj Banhfap Doinyoengx Baihsae Daih Haifat Baenz Aenbuenz Moq

Geij ngoenz gonq, Swcigh Dangjveij, Cwngfuj yaenqfat 《Aen Fangh'an Hengz Gij Yigen Cunghung Cunghyangh, Gozvuyen Vixyinx Gak Baih Youq Seizdaih Moq Doinyoengx Ranghdieg Baihsae Daih Haifat Guhbaenz Aenbuenz Moq》》(bailhaeng neix gangj dinj baenz《Aen Fangh'an》), ok 7 cungj 40 aen banhfap, aeu daeuj doinyoengx gih raeuz hailangh suijsingz lai sang hwnghat baenaj lai ndei.

《Aen Fangh'an》neix ok 7 cungj banhfap hengz《Gij Yigen Cunghung

Cunghyangh, Gozvuyen Vixyinx Gak Baih Youq Seizdaih Moq Doinyoengx Ranghdieg Baihsae Daih Haifat Guhbaenz Aenbuenz Moq》. 7 cungj banhfap neix baudaengz: Hawj gijnyieg bienq ak, bouj gizdinj, cuk gij diekdaej hwnghat lai maenh; yungh gij leixniemh hwnghat moq vixyinx gih raeuz canjnieb lai ndei hwnghat; doengzcaeaz hwnqguh "it rangh it roen", dazyinx gyavaiq cauhaeb aenbuenz moq cienzbouh hailangh couhwdg "yiengq coh baihnamz, lienz doeng baihbaek,

yungh haeuj baihdoeng, gap daengz baihsae"; cat seuq gaiqbaiz gim couhwdg bya heu raemx saw, hwnqguh aen Gvangjsih ndeiyouq ndei guhhong; caiq gyalaez gajgwz giz youqgaenj, gyaak rengzdoengh hwnghat; haenqrengz bauj hawj vunz lai gwngwn daenjdaenj lai ndei, coinyoengx aenbiengz huzndei onjdingh; baengh gaujhwz, caizcwng, ginhyungz, canjnieb, vunzcaiz, cwngcwz daengj gyarengz haeujcoengh, gyaak cujiez baujcaeng.

(Gangh Anh/康安)

Baihguenjbanh: Gvangjsih Bouxcuengh Swcigih Minzcuz Cunghgyau Swvu Veijyenzvei

Biengauj okbanj: Gvangjsih Minzcuz Bause

Geizsoq: Gungh daih 3443 geiz Geiz neix 8 banj

SIUSIK DINJ

● 9 nyied 19 hauh daengz 23 hauh, Cauhbingsz Yen banh aen hozdung "aenboi lijyouz guhdaez" doxdax minzcuz cienzdoengj dijuj. Ndawde doxdax hanghmoeg miz bau giuzcaw, bau aendomq caeuq baenzdoi vit feihbyauh, daengx yienh gungh miz 100 lai boux gak cuz ginzcong camgya hozdung.

(Hoz Vazlanz)

● 9 nyied 23 hauh, Bingzgevi Gih banh bansonlien minzcuz cunghgyau cwngcwz lijun caeuq guh hong cauhaeb minzcuz doxgiet baenaj. Gungh miz 50 lai boux camgya sonlien, gyoengqde dwg doenghboux ganbu ndaw gih neix gak yanghcin, gak bumwnz, gak bouxcwngzyenz ndaw Bingzgevi cihbu gak minzcuj dangjbai, doenghboux daibyauj ndaw cihsiz fwnsiw lenzyizvei rog dangj daengj.

(Vangz Ligenh)

● 9 nyied 25 hauh, aen hozdung 2020 nienz Hozciz Si "lajmbanj banggunz" gagnyienh fugsah caeuq aen cawjdaez hozdung "ngoenzciet raeuz ciet betcibngux" youq Lozcwngz Mulajcuz Swciyen Swbaj Cin Dasanh Cunh gawjbanh. Ngoenz de, gyoengqvunz guh hong fugsah de fat 300 faenh swliu hawj vunz lai, coengh 30 boux ginzcong yawjbingh, coengh 20 boux feigyaeuj, camnai 15 hoh ranzungzhoj.

(Luz Ciuhyinz)

● 9 nyied 25 hauh, Nanzfangh Denvangj Gvangjsih Liujcouh Yungzanh Gunghden Giz guh aen hozdung son' gyaug aigoz cuji aeu "dawz ndei diuzrap, laebdaeb baenaj" guh cawjdaez. Aen hozdung neix caeuq betcibngux, gozging song ngoenzciet neix doxgap, gyoengq gunghyinz baiz ok gij doz "mbaw geizguek", yiengh saw "71", doz yezbingj daengj, comz rengz baijok gij yienghsiengq ndei gyaeg guek, gyaeg ranz, gyaeg hong.

(Cinz Ginghoz)

Daengq Beixnuengx

Ciet guekgingq cuengqgyaj, ndwen 10 ngoenz 7 bauqcej mbouj ok lo. Hoh gyoengq beixnuengx ngoenzciet angqyangz vuenyungz!